

Un bes estableci, e ta habri porta pa mas posibilidad

“Mas leu cu facilita biahe pa Europa, Pre Clearance por consolida e economia di Aruba como un hub”



ORANJESTAD – E beneficio y potencial di e establecimiento di Pre Clearance Europeo na Aruba ta bay mas leu cu djis e facilidad ora di biaha pa Hulanda. Un bes ehecuta, e facilidad ta habri e portanan di oportunidad cu den futuro por traduci den bentananan economico sumamente grandi pa Aruba como pais. E siman aki Prome Minister Mike Eman a haci entrega di e rapport “Roadmap to Pre Clearance” na Secretario di Estado pa Siguridad y Husticia, Fred Teeven. Den dje e grupo trabou consistiendo di autoridadnan Arubiano y Hulandes a duna nan conseho riba e proyecto y a detaya e plan pa sigui.

PROME FASE

Apesar cu e proyecto aki tin

añanan andando, ainda e ta den su prome fasenan. Stap pa stap ta avansando di manera sigur den e direccion cu gobierno kier hiba e isla y esey ta pa bira Aruba un elemento esencial den e relacionnan comercial entre Europa y Latinoamerica.

Esaki na su luga mester genera entradanan substancial pa nos economia. E siguiente stap ta pa Gobierno Hulandes presenta e proyecto na Union Europeo y haya e aprobacion necesario. Mientras tanto Premier Eman a expresa su satisfaccion pa e impresion di optimismo y boluntad cu el a haya na Hulanda y p’esey mes tin un perspectiva positivo cu pronto lo cuminsa ehecuta e proyecto.

PRIVILEGIO

“Nos a pone e tema aki como un punto importante pasobra no unicamente e ta facilita nos como pasaheronan facil pa biaha pa Hulanda y Europa pero e ta bay marca mas ainda con Aruba en berdad ta e ‘gateway’ pa Europa,” Minister President a indica. E ta splica cu esaki literalmente ta traha como un ‘hub’ cu ningun otro isla of pais den e region tin.

No tin otro nacion na mundo, cu no ta miembro di Union Europeo cu tin e privilegio di tin un facilidad caminda pasaheronan ta pasa den un pre clearance y cu esey di biaha bo tin autorisacion di Inmigracion y Douane pa drenta Europa via Hulanda.

FORMULA

E no ta un formula nobo. Ya caba su exito a keda demonstra cu e Pre Clearance Mericano cu a keda introduci durante maneho di Gabinete Henny Eman III. “Hopi pasahero

cu ta bini di Latinoamerica ta keda un par di ora of dia na Aruba pa por haci uzo di e Pre-Clearance pa Merca,” Premier Eman a indica. E rijnan na aeropuerto pa Miami ta hopi largo.

Esaki ta facilita enormemente e molester di biaha ora cu por pasa di un manera mas eficiente e control di douane y inmigracion Mericano prome cu subi avion. “Hopi pasahero ta prefera di pasa esaki na inicio, p’esey e Pre-Clearance a resulta un exito asina grandi pa Aruba.

Si nos realis’e pa Europa tambe mi ta sigur cu esaki lo tin como efecto cu esunnan cu ta bula for di Latinoamerica pa Europa sigur lo uza Aruba como hub,” e mandatario a bisa. Mester djis pensa con atractivo esey ta haci Aruba pa tur aerolinea.

KEDA ALGUN DIA

Ademas cu e pasaheronan aki no ta djis pasa door di Aruba,

pero ta probecha di keda un of algun dia cu e beneficio cu esey tin pa nos economia; tambe por pensa riba otro posibilidadnan. “E ta duna Aruba tambe un nomber hopi special den mundo, cu bo tin e tipo di relacionnan cu blokean di paisnan asina importante cu nan a pone un tipo di facilidad asina pa demostra nan confianza den bo pais.” Ora cu Gabinete Mike Eman concreta e logro aki, ta haya adicionalmente e oportunidad di demostra na Union Europeo cu Aruba ta un pais di responsabilidad y credibilidad.

E confianza y estabilidad ey ta bolbe habri porta pa den futuro, un proyecto manera e waf moderno di Barcadera, por comberti su mes atrobe, den un hub di carga entre e dos continentenan. Esey riba su mes, ta representa un mercado enorme pa e economia di Aruba. □